



Datë: 28.04.2026

A.nr.455/2026

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi-kryetare, Malsore Gashi-Bajraktari dhe Eshref Shabani- anëtarë, më Merlinda Ramaj në cilësinë e procesmbajtëses, në procedurë sipas ankesës me numër A.nr.455/2026 të datës 21.04.2026, të parashtruar nga ankuesi A.B, të cilin e përfaqëson Avokat Burim Halili, kundër organit të punësimit: Akademia e Shkencave dhe Arteve të Kosovës, në çështjen juridike “*Kërkesë nga marrëdhënia e punës*” duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.8 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, më datë 28.04.2026, nxjerrë, këtë:

V E N D I M

- I.** Këshilli i Pavarur Mbikëqyrës për Shërbimin Civil të Kosovës ***shpallet jo kompetent*** për shqyrtimin dhe vendosjen e ankesës A.nr.455/2026, të datës 21.04.2026, të parashtruar nga ankuesi A.B.
- II.** Lënda i dërgohet për shqyrtim dhe vendosje organit kompetent/Komisionit për Ankesa në Akademinë e Shkencave dhe Arteve të Kosovës.

A r s y e t i m

Ankuesi, A.B (në tekstin e mëtejme referuar: Ankuesi), më datë 21.04.2026, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër Vendimit Nr.1451 të datës 27.11.2025, të Komisionit Disiplinor të Akademisë së Shkencave dhe të Arteve në Akademinë e Shkencave dhe Arteve të Kosovës.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) nga administrimi i shkresave të lëndës ka gjetur se Këshilli i Pavarur Mbikëqyrës për Shërbimin Civil i Kosovës ***nuk është kompetent*** për të vendosur për ankesën me numër A.nr.455/2026, të datës 21.04.2026, të parashtruar nga ankuesi, ***sepse:***

Nga provat e çështjes rrjedhë se ankuesi është i punësuar në Akademinë e Shkencave dhe Arteve të Kosovës, dhe se i njëjti sipas shkresave të lëndës përkatësisht Akt Emërimit të datës 31.05.2024, mbanë pozitën e punës Zyrtar për Transport, klasa profesional 3.

Ankuesi ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër Vendimit Nr.1451, të datës 27.11.2025, të Komisionit Disiplinor të Akademisë së Shkencave dhe të Arteve në Akademinë e Shkencave dhe Arteve të Kosovës, me pretendimin së Komisioni Disiplinor shkeljet i ka vlerësuar gabimisht si shkelje të rënda disiplinore, duke përbërë shkelje esenciale të procedurës administrative, shkelje të parimit të paanshmërisë si dhe zbatim të gabuar të së drejtës materiale. Kërkon anulimin e Vendimit Nr.1451, të datës 27.11.2025, të Komisionit Disiplinor të Akademisë së Shkencave dhe të Arteve si të paligjshëm si dhe të urdhërojë kthimin e ankuesit në vendin e tij të punës.

Në kuptim të përcaktimit të kompetencës së Këshillit në pikëpamje lëndore, Kolegji i Këshillit i'u referua dispozitave të nenit 5 të Ligjit Nr.08/L-197 për Zyrtarët Publikë, më të cilin përcaktohet se: 1. *Kategoritë e zyrtareve publik janë: 1.1. Nëpunës i shërbimit civil; 1.2. Nëpunës i shërbimit publik; 1.3. Krijues dhe përformues i artit dhe kulturës; 1.4. Nëpunës teknik dhe mbështetës; dhe 1.5. Zyrtar i kabinetit.* 2. **Nëpunës i shërbimit civil** është zyrtari publik në kuadër të shërbimit civil i cili merr pjesë në formulimin dhe/apo zbatimin e politikave, monitorimin e zbatimit të rregullave dhe procedurave administrative dhe ofrimin e mbështetjes së përgjithshme profesionale dhe administrative në zbatim. Nëpunës i shërbimit civil ushtron detyrën në pozitën përkatëse, duke filluar nga zyrtari profesional deri në pozitën e drejtuesit të lartë, në administratën e Presidentit të Republikës së Kosovës, në administratën e Kuvendit të Republikës së Kosovës, në Zyrën e Kryeministrit të Republikës së Kosovës, në Ministri, në Agjenci Ekzekutive dhe në degë lokale të tyre, institucione të pavarura kushtetuese, në agjenci të pavarura dhe rregullatore, në administratën komunale dhe çdo nëpunëses statusi i të cilit është përcaktuar si nëpunës i shërbimit civil, me ligj të veçantë. 3. **Nëpunës i shërbimit publik** është zyrtari publik i cili ofron shërbime publike të drejtpërdrejta për qytetarët në fushën e arsimit, shëndetësisë, kulturës, **artit**, në fushën e mjekësisë ligjore, si dhe shërbime tjera të ngjashme publike. Nëpunësi i shërbimit publik ushtron detyrën në pozitën përkatëse duke filluar nga niveli profesional deri në nivelin e lartë drejtues. Nëpunësi i shërbimit publik është edhe nëpunësja/i i shërbimeve të brendshme në administratën e shërbimeve publike pjesë e administratës shtetërore, në administratën e shërbimeve publike apo pjesë e Komunës. Rrjedhimisht, në kuptim të këtyre dispozitave ligjore rezulton fakti së të gjithë të punësuarit duke përfshirë zyrtarët e nivelit të lartë drejtues, drejtues, profesional dhe shërbimeve të brendshme në kuadër të institucioneve nga fusha e artit, kanë statusin e nëpunësit të shërbimit publik.

Rrjedhimisht, duke u bazuar në nenin 2 dhe 3 të Ligjit Nr. 05/L -038 Për Akademinë e Shkencave dhe të Arteve të Kosovës, rezulton së Akademia e Shkencave dhe Arteve të Kosovës, është institucioni më i lartë i shkencës dhe i artit i themeluar nga Kuvendi i Republikës së Kosovës, ku veprimtaria e Akademisë shtrihet në fushën e shkencës dhe të artit, përfshirë promovimin, kultivimin, nxitjen dhe zhvillimin e mendimit shkencor dhe të krijimtarisë artistike. Andaj, duke qenë së ankuesi mbanë pozitë profesionale në kuadër të Akademisë së Shkencave dhe Arteve të Kosovës, si institucion nga fusha e artit dhe shkencës, atëherë, pozita e ankuesit kategorizohet në kategorinë e nëpunësve të shërbimit publik.

Duke u nisur nga konstatimi së ankuesi nuk ka statusin e nëpunësit civil dhe meqenëse sipas nenit 6, paragrafi 1, nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Këshilli është kompetent për të shqyrtuar vetëm ankesat e nëpunësve civilë dhe kandidatëve për praninë në Shërbimin Civil, Kolegji konstaton së Këshilli nuk ka kompetenca lëndore

për të vendosur lidhur me ankesën me numër A.nr.455/2026 të datës 21.04.2026, të parashtruar nga ankuesi A.B.

Në kuptim të udhëzimit të palës ankuese lidhur me të drejtën në mjete juridike, Kolegji ve theksin të neni 8 i Ligjit Nr. 08/L-294 për Ndryshimin dhe Plotësimin e Ligjit Nr. 08/L-197 për Zyrtarët Publik, ndërlidhur me nenin 27 të Ligjit Nr. 08/L-197 për Zyrtarët Publik ku përcaktohet se : *Nëpunësi i shërbimit publik dhe nëpunësi teknik dhe mbështetës kanë të drejtë të parashtrojnë ankesë tek Komisioni i Ankesave i themeluar nga punëdhënësi, për çdo veprim apo mosveprim që i cenon të drejtat apo interesat e ligjshme që burojnë nga marrëdhënia e punës. Qeveria pas propozimit të ministrisë përgjegjëse për administratë publike, me akt nënligjor përcakton procedurën dhe rregullat për themelimin, përbërjen dhe mandatin e Komisionit të Ankesave, pra, zyrtarët publikë të kategorisë së shërbimit publik dhe të kategorisë administrative mbështetëse, në rast të pretendimeve për shkelje të të drejtave të tyre nga marrëdhënie e punës, fillimisht mund të parashtrojnë ankesë tek punëdhënësi i cili themelon një Komision të Ankesave në pajtim me kërkesat ligjore, e më pastaj, duke ju referuar përcaktimeve ligjore sipas nenit 77 të Ligjit Nr.08/L-197 për Zyrtarët Publikë, mund të ushtrojnë padi në gjykatën kompetente në pajtim me nenin 78 dhe 79 të Ligjit Nr. 03/L-212 i Punës ku shprehimisht thuhet se: **Neni 79, paragrafi 1** “... 1. I punësuar i cili vlerëson se punëdhënësi ka shkelur të drejtën e marrëdhënies së punës, mund të paraqesë kërkesë te punëdhënësi apo organi përkatës i punëdhënësit nëse ekziston, për realizimin e të drejtave të shkelura. 2. Punëdhënësi është i obliguar për të vendosur sipas kërkesës së të punësuarit, në afatin brenda pesëmbëdhjetë (15) ditëve nga data e pranimit të kërkesës. **Neni 79 paragrafi 1:** Çdo i punësuar i cili nuk është i kënaqur me vendimin me të cilin mendon se i janë shkelur të drejtat e tij, ose nuk merr përgjigje brenda afatit nga neni 78 paragrafi 2. të këtij ligji, në afatin vijues prej tridhjetë (30) ditësh, mund të inicioj kontest pune në Gjykatën Kompetente...”*

Marrë parasysh konstatimin si me lartë se Këshilli i Pavarur Mbikëqyrës për Shërbimin Civil të Kosovës nuk ka juridiksion për të vendosur lidhur me ankesën A.nr.455/2026, dhe meqenëse nga shkresat e lëndës konstatohet fakti se ankuesi nuk ka parashtruar ankesë të brendshme pranë organit të punësimit, atëherë, bazuar në nenin 75, paragrafin 1 të Ligjit Nr.05/031 për Procedurën e Përgjithshme Administrative, lënda i dërgohet për shqyrtim dhe vendosje organit kompetent, në këtë rast Komisionit për Ankesa në Akademinë e Shkencave dhe Arteve të Kosovës.

KËSHILLË JURIDIKE: Ky vendim hyn në fuqi ditën e nënshkrimit nga Kryetarja e Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
A.nr.455/2026

Merlinda RAMAJ

Procesmbajtëse

Ardita Haxhnikaj DEMI

Kryetare e Kolegjit

Vendimi i dorëzohet:

- Përfaqësuesit të autorizuar Avokat Burim Halili;
- Njesisë për Burime Njerëzore në Akademinë e Shkencave dhe Arteve të Kosovës; dhe
- Arkivit të KPMSHCK-së;